

34  
**DESCRIPTION DES FONDS ET**  
profondeurs, au long d'alcunes Prouinces de nostre navigation

*Premierement de Gascogne, Poictou, & Bretagne.*

**H**ors de la Riuiere de Bordeaux, dict la Garonne, à cognoissance de terre, la Mer est profonde 40. toyses, ou brassées, & à veüe d'œil de la tour de Cordan elle est profonde 30. toyses  
Vis à vis & le long de la coste du pays de Poictou 16. lieuës de terre & hors d'Olone, la Mer est profonde 25. toyses: & approchant ledict pays à 8. lieuës, sera la profondeur 35. toyses. Et dans la trace nauale, on droit cours entre Porthuys & Heys est la profondeur 30. toyses: dans la droicte trace de Heys pareillement 30. toyses: entre Heys & Bel-isle, aussi 30. toyses. Et hors la droicte trace nauale est la profondeur 35. toyses, estant dans la trace nauale l'on y trouue la profondeur de 25. toyses. A deux traicts ou veües d'œil loing de Heys l'on trouue 45. toyses.

Vingt & deux lieuës de Bel-Isle vers le Sud la Mer est profonde 70. toyses. Et du bout de Nortoëst de la mesme Isle, vers le Sudouest 9. lieuës, la profondeur est 60. toyses. Et à my pays de Bel-Isle sur 40. toyses, l'on verra terre, dans la trace & voye nauale, entre Bel-Isle, & Seemse, l'on n'approchera la terre plus pres que de 50. toyses, ou pour le moins 45. Item celuy qui de Bel-Isle tire Ouest quart au Nordoëst, & vient vis à vis de Gloylant trouuera la profondeur de 60. toyses. Dehors & en dedans de la Roche gisante arriere de Gloylant en mer, y est la profondeur de 40. toyses. Sur 65. toyses, hors de la Penmarque Occidentale, l'on n'auigera avec vn vent d'O. N. O. hors la riuiere de Zeemse, & ne fault approcher de nuit plus pres que de 55. toyses. Et le fond est gros & rouge sable, meslé de pierrettes rôdes. O. & S. O. demie lieuë de la Riuiere susdicte, y a vne rãgée de Roches, illec est la profondeur 7. toyses, & entre ladicte Riuiere Zeemse & lesdictes Roches, est la profondeur 50. toyses.

Entre ladicte Riuiere Zeems & Heysant en la trace nauale le fond est de 55. toyses, ledict fond est de gros rouge sable, meslé de rondes pierrettes & noires. Joindant à Heysant la profondeur est de 45. toyses, & endedans est le fond inegal, tresdifficile à fonder. Enuiron 6. lieuës de Heysant vers le Sudouest est la profondeur de 70. toyses, ledict fond est de petit sable blanc, entre meslé de petites coquillettes blanches, & menus festus en forme d'aguiilles, à cela se cognoist que Heysant gist vers l'Est de vous. Et estant le sable blanc entre meslé de grandes coquilles blanches, lors gist Heysant Sudest de vous. Et n'estât assureé d'iceulx fonds, tirez vers le Nort, trouuant lors meilleure profondeur vous estes vers Zeems, & trouuant moindre profondeur, lors vous estes dans le Canal enuiron le Nort de Heysant.

Item entre Heysant & Obeuerac en la trace nauale, la profondeur est de 60. toyses. Entre Heysant & les Sorlingues, au milieu du Canal est la profondeur 70. toyses. Et estant entre la riuiere Zeems & Heysant sur 70. toyses, lors sera le fond, petites noires pierrettes molles, & terre iaulne. Et trouuant le sable gros & rouge, tirez vers le N. iusques à ce que trouuez du sable blanc, meslé de longues choses, lors vous estes sans doute à l'entrée du Canal.

Vn navire venant de Cizarga ou Cesarie (ainsi par nous nommée) par la Mer d'Espagne, par vn cours de Nort Nortoest, vers Heysant, & trouuant le fond de 80. toyses, lors il est hors, ou de Heysant 13. ou 15. lieuës, & approchant de plus pres, se trouuant le fond de 70. toyses sera loing de Heysant 10. lieuës: & trouuât le fond de petites coquillettes iaines avec petites pierres noires, lors on est vers la riuiere de Zeems, & faut lors tirer vers le Nort pour euitter Heysant, iusques à ce qu'on trouue du sable blanc & des longs festus comme esguilles, car ce sont les fons de l'entrée du Canal.

Entre Heysant & l'Isle de Bas sur 40. toyses, on sera loing de terre 4. lieuës, & ne faut approcher de nuit plus pres que de 45. toyses, deux lieuës hors de Obeuerac se trouue le fond 55. toyses & 8. lieuës hors, des sept Isles y est la profondeur 50. toyses.

Item vne lieuë arriere des Escueils d'Obeuerac, gist vne Roche dessous l'eau, & s'il vous convient laüer, ou prendre courtes traueses, entre les Fours, & Obeuiac, n'approchez pas la susdicte Roche plus pres que de 40. toyses, Ouest Sudouest, & Sud Ouest des sept Isles, n'approchez pas la terre plus pres que de 40. toyses, mais illec vers l'Ouest pouuez vous approcher sur 30. ou 25. toyses.

Item vn navire estant Ouest Sudouest, & Sudouest quart à l'Ouest des Sorlingues sur 8. toyses, & se trouuât (par l'usage de l'arc gradual ou astrolabe) estre vers le Nort 49. degrez & 15. minutes, lors il sera 26. lieuës de terre, & luy conuient tirer. Est quart au Nordest iusques à ce qu'il trouue la profondeur de 66. toyses, lors il est sans doute entre les Sorlingues & Heysant dans le Canal, & lors il luy conuient tirer plus vers le Nort pour gaigner l'Angleterre, & il y a de profondeur entre le bout d'Angleterre & Lyfart 55. toyses.

**PROFONDEURS, ET FONDS ENTRE YRLANDE,**  
Angleterre, & Normandie.

**T**rois lieuës de l'Isle d'Orsey sous l'Irlande la mer y est profonde 45. toyses, entre Orsey & Cape de Clere dans la trace nauale y a de profondeur 42. ou 43. toyses. Item de Cape de Clere iusques aux Isles de Saltées y a de profondeur en la trace nauale 45. toyses, & deux lieuës arriere d'Irlande y est le fond